



## Punto di bista di organisashonnan sosial Boneriano riba e Konsepto di Strategia Nashonal pa Adaptashon Klimátiko (NAS) 2026

Organisashonnan sosial di Boneiru ta risibí e Strategia Nashonal di Adaptashon Klimátiko (NAS) '26 konseptual ku brasa habrí komo un promé paso pa un Reino resiliente pa klima. Nos ta apresiá ku Hulanda Karibense a haña un lugá eksplísito i independiente den e strategia revisá aki, kontrali na plannan nashonal anterior. Ta positivo ku gobièrnu sentral ta rekonosé ku e islanan ta den frente di e krisis di klima i ku atenshon spesífiko ta nesesario pa nos vulnerabilidatnan ekológiko i sosio-ekonómiko úniko, manera subida di nivel di laman i e vulnerabilidat di nos refnan di koral.

Sinembargo, den su forma aktual, ainda e strategia pa Hulanda Karibense ta karesé akshon krusial. Miéntas ku Hulanda Oropeo ta disfrutá di legislashon i bionnan di fondo, e strategia pa Boneiru ta keda stanká na 'eksplorashonnan'. Sin proposishonnan di maneho konkreto òf garantianan tokante protekshon ekivalente, derechonan humano i finansiamentu struktural, e efektivitat di e plan aki ta keda limitá.

E sentensia den e Kaso di Klima di Boneiru (yanüari 2026), ta indiká klaramente ku gobièrnu sentral na Den Haag no mester mira protekshon di klima pa Boneiru komo un opshon di maneho no-vinkulante, pero tin un deber konstitushonal di kuido pa garantisá derechonan humano fundamental i seguridat nashonal na Boneiru.

Komo un koalishon amplio di organisashonnan sosial i ekspertonan Boneriano, nos ta boga pa protekshon igual pa kada siudadano den Reino, di akuerdo ku e desishon di korte den Kaso di Klima Boneiru. P'esei nos ta konsehá enfátikamente pa adoptá e siguiente prinsipionan general den e desaroyo mas aleu di e NAS:

- **Finansiamentu struktural en bes di maneho di fluktuashon:** Un transishon di finansiamentu di proyekto i programa di término kòrtiku pa finansiamentu struktural ta nesesario. Boneiru, meskos ku Hulanda Oropeo, tin derechi riba presupuestonan struktural pa medio di por ehèmpel apertura di fondo Delta.

- **Maneho ekivalente (Comply or Explain):** Mester apliká maneho di Gobièrnu Sentral pa loke ta trata seguridat di klima na Boneiru, Saba, i Sint-Eustatius integralmente. Evaluashonnan di riesgo i trayektonan di adaptashon ta krusial. Desviashon for di maneho ku ta apliká pa Hulanda Oropeo ta permití solamente pa motibunan konvinsente, kaminda Gobièrnu Sentral ta obligá pa demostrá kon un alternativa ta garantisá un nivel di protekshon ekivalente.
- **Responsabilidatnan i gobernashon:** E éksito di adaptashon di klima ta dependé di ekspertisio lokal i kapasidat di implementashon. Mester establese un struktura sólido entre Gobièrnu Sentral i Entidat Públiko Boneiru (OLB), den kua tumamentu di desishon i fluhonan di finansiamentu ta definí klaramente. Pa evitá ku e strategia ta keda un kolekshon no-vinkulante di ‘opshonnan di maneho’, nos ta pidi pa krea un kuadro legal vinkulante pa e divishon di e tareanan aki.
- **Koperashon regional den Reino:** E infrastruktura vital na Boneiru, i tambe na Saba i Sint Eustatius, ta dependé hopi di e islanan bisiña di Curaçao, Aruba, i Sint Maarten. Debí ku e krisis di klima ta afektá seguridat nashonal, Reino mester invertí aktivamente den adaptashon di klima riba e islanan outónomo den region tambe.

Segun e koalishon, mester mehorá, ahusta i desaroyá e NAS mas aleu riba e siguiente kuater puntonan:

## 1. Protekshon ekivalente

*E nivel di ambishon i protekshon na Boneiru no por ta menos ku na Hulanda Oropeo. Mester apliká normanan i regulashonnan di seguridat ekivalente, teniendo e konteksto Boneriano den konsiderashon.*

E konsepto aktual di Strategia Nashonal pa Adaptashon Klimátiko (NAS) ta rekerí refinashon, normanan di seguridat ankrá den lei pa Boneiru ta hasi falta.

- **Eksigensia pa standardisashon:** Perkurá pa ankra un ‘norma basiko di protekshon’ den lei ku ta ekivalente na e normanan na Hulanda Europeo pa loke ta trata aseptashon di riesgo (e probabilidad di inundashon). Mester apliká normanan, guianan, plannan, i leinan tokante, por ehèmpel, strès di kalor, awa, òf skarsedat di awa di bebe mas tantu ku ta posibel òf desaroyá spesifikamente pa Boneiru.



- **Nivel ekivalente, adaptashon lokal:** Mester apliká e mesun nivel di ambishon i aseptashon di riesgo ku ta apliká na Hulanda Oropeo, na Boneiru, pero mester evitá ‘copy-paste’ Oropeo. E implementashon di guia i leinan mester ta spesífiko pa konteksto (teniendo kuenta ku e ekologia úniko di e isla). Ademas, konosementu tradishonal Boneriano tokante maneho di awa (manera restourashon di damnan históriko, limpiesa, i regreso di tanki di aw’i yobida i kèldernan di awa) mester guia e despliegue di medidanan di adaptashon, partikularmente solushonnan apropiá basá riba naturalesa.
- **Protekshon di herensia kultural i konosementu tradishonal:** Kambio di klima no ta menasá solamente naturalesa pero tambe kultura i identidat Boneriano. Bida den kunuku, peska tradishonal, kasnan históriko di katibu, i herensia intangibel manera tradishon i fiestanan ku ta interkonektá. E kultura Boneriano mester bira un parti integral di e analisis i medidanan di riesgo. Ademas, ta esensial ku e NAS ta invertí den mantenshon di e koheshon sosial ku ta karga e tradishonnan akí; al fin i al kabo, sin komunitatnan fuerte (community building), e konosementu inmaterial tokante un bida resistente na cambio di klima riba e isla tambe lo dispersé."
- **Finansiamentu di naturalesa ekivalente:** E NAS ta rekonosé Boneiru komo un ‘hotspot’ di biodiversidat vulnerabel pero no ta inkluí un plan pa maneho di koral, pal’i mangel, i eko-sistemanan. Miéntas ku tareanan struktural na Hulanda Oropeo ta kubrí pa medio di e sistema di Supsidio di Naturalesa i Paisahe, ‘Subsidiestelsel Natuur en Landschap’ (SNL), Boneiru ta dependé di e subsidio diskreshonario pèrtá òf finansiamentu temporal di proyekto. E ousensia di provinsia òf maneho di awa no por resultá den e echo ku no ta fortalecé finansiamentu; Gobièrnu Sentral mester kompensá e defisiensia aki ku un areglo struktural, ekivalente.
- **Fecha límite 2030:** Segun e sentensia, mester implementá e standardisashon promé ku 2030 i proveé redukshon di riesgo ku por demostrá na habitantenan.

## 2. Finansiamentu ekivalente, adekuá i struktural

*Garantisá e abilidad pa tuma medidanan di protekshon di klima riba termino largu. Habri e fondo Delta pa Karibe Hulandes i sigurá finansiamentu adishonal. Sòru pa uza e plaka na un manera apropiá i efisiente.*



Mester sòru pa finansiamentu struktural i adishonal ta disponibel, ekivalente na loke tin na Hulanda Oropeo. Mester garantisá ku por tuma medidanan di protekshon di klima a largu plaso. E retraso na Boneiru ta signifkante. E reto di finansiamentu pa Boneiru ta kalkulá 1.2 - 1.8 bion dòler. Ta kalkulá ku keda sin hasi nada por kosta por lo ménos 5.6 bion.

- **Fondo Delta:** Mester ta alineá e sistema di finansiamentu di Hulanda Oropeo mas tantu posibel. Mester habri e Fondo Hulandes Delta pa Boneiru, Saba, i Sint Eustatius. Por finansiá medidanan ku ta enfoká riba seguridat di awa, awa dushi i kalidat di awa for di e fondo aki.
- **Fondo di Klima i Adaptashon Karibense:** Pa suplementá e apertura igual di e fondo Delta, mester habri un Fondo di Klima i Adaptashon Karibense struktural i suplementario pa permití finansiamentu di medidanan ku ta kai pafó di e Fondo Delta, manera esnan relashoná ku kalor, planifikashon di espasio, reforsá kasnan resistente na klima, i airco. Mester hasi e fondonan disponibel di un manera lokalmente apropiá i efisiente di tal forma ku esakinan ta benefisiá e pueblo di Boneiru realmente.
- **Gastu sosial amplio:** Finansiamentu, eksplísito, no por bira un redistribushon di presupuestonan ekológiko eksistente, manera e Plan di Maneho di Naturalesa i Medio Ambiente, Natuur- en Milieubeleidsplan (NMBP-CN), komo ku e nesesidatnan di e habitantenan ta ekstendé hopi mas leu ku konservashon di naturalesa so. Tambe mester desplegó presupuestonan pa bibienda públiko i protekshon di barionan vulnerabel.

### 3. Gobernashon i Implementashon

*Gobièrnu hulandes tin e responsabilidad pa duna Boneiru e kapasidat pa tuma akshon i garantisá protekshon konkreto. Partisipashon lokal, salvaguardá kultura i konosementu tradishonal mester guia solushonnan i implementashon.*

E implementashon di adaptashon di klima ta rekerí un struktura di gobernashon inklusivo. P'esei ta nesesario pa establese un Struktura di Implementashon di Klima independiente ku un mandato lokal klá i raspá.



- **Divishon transparente di tareanan entre outoridatnan:** NAS mester krea un kuadro obligatorio pa e divishon di tareanan entre Gobièrnu Sentral i e Entidat Públiko. E deber fundamental di kuido i finansiamentu ta inkondishonalmente den man di Estado, miéntras ku Boneiru mester tuma delantera den e ehekushon. Si ta nesesario mester sostené e atministrashon na Boneiru, por ehèmpel dor di kompartí ekspertisio.
- **Struktura di implementashon:** E Mesa di Klima di Boneiru a sugerí diferente opshon pa strukturashon di gobernashon pa salvaguardá adaptashon. E preferensia ta pa un konstrukshon híbrido entre e Entidat Públiko i Gobièrnu Sentral den kua ta kombiná inkorporashon i konosementu lokal ku finansiamentu dor di Gobièrnu Sentral i un invershon den desaroyo di ekspertisio riba Boneiru. Ta importante pa hasi akuerdonan klá pa loke ta trata e divishon di ròlnan i ku finansiamentu struktural ta na su lugá. Un opshon alternativo ta e establecimento di un organisashon òf fundashon di implementashon separá. Funshonarionan spesífiko, manera un enviado spesial òf komisario regulatorio, por ta un adishon útil na e dos opshonnan.
- **Plan di Klima di Boneiru:** E Plan di Klima di Boneiru sostené lokalmente mester forma e base pa e MER i e agènda di ehekushon.
- **Aliniashon:** Pa loke ta trata Boneiru, NAS mester aliniá direktamente ku e dokumento di polítika di Vishon 2050 (den kua e plan di klima, e vishon struktural, e plan di medio ambiente, i e plan di naturalesa ta sostené), i tambe ku e Plan di Desaroyo Lokal, *Lokale Ruimtelijke Ontwikkelingsplan* (ROB).
- **Multi-Hazard Early Warning System - fecha límite 2027:** E prioridat mas altu den gobernashon ta sinta den realisá un Sistema di Atvertensia Tempran pa Multi-Peligro (MHEWS) kompletamente operashonal promé ku 2027, manera ordená pa hues. E temblor resien na Venezuela a suprayá e importansia di esaki. E sistema aki mester ta fásil pa usa i aksesibel pa tur siudadano (inklusivo via alerta SMS den e idiomaan lokal Papiamentu, Spañó, Ingles, i Hulandes) i mester vigilá menasanan lento manera sekura i strès di calor ademas di kalamidatnan agudo. Ademas, e sistema di atvertensia aki mester ta mará direktamente na fortifikashon di maneho di krísis físiko riba e isla, manera sigurá suministro di emergensia inmediatamente despues di un kalamidat.

#### 4. Adaptashon Integral di Sistema di Mitigashon i Salubridat Públiko

*Kambio di klima ta afektá bida diario na Boneiru den tur faseta: suministro di kuminda, kuenta di koriente, i salú. Mester aloká fondonan di klima riba resiliensia i e eko-sistemanan, barionan i individuonan mas vulnerabel ku ta enfrentá pobresa (energétiko), strès di calor i skarsedat di awa, i tambe na agrikultura i peska*



*sostenibel. Sin redukshon rápido di emishon i kambio sistemátiko, adaptashon ta manera karga awa hiba laman.*

Sin redukshon di emishon mas rápido i un revishon integral di nos sistemanan básiko, adaptashon na klima ta insuficiente. E krísis di klima ta impaktá Bonerianonan direktamente den nan bida diario: e pagabilidad di un plato di kuminda, un kas fresku den un bario kayente, i salubridat públiko en general. Ta importante pa oumentá e resiliensia di e habitantenan i sostené e eko-sistemanan, barionan i individuonan mas vulnerabel ku ta enfrentá pobresa (energétiko), strès di kalor, i skarsedat di awa, i tambe kunukunan i e sektor di peska sostenibel. Por inkluí Hulanda Karibense den regulashonnan vigente na Hulanda Oropeo, ku ta varia di invershonnan den salubridat públiko te na produkshon di kuminda i konservashon di naturalesa.

Konforme e sentensia den e Kaso di Klima di Boneiru, mester establese metanan obligatorio pa redukshon di emishon pa henter Hulanda, i tambe medidanan di polítika konkreto, denter di 18 luna.

- **Independensia di energia i adaptashon di sistema:** Aselerá e transishon di energia lokal dor di tene infrastruktura vital (manera produkshon di awa di bebe i friamentu den barionan) pagabel i independiente di importashon di kombustibel fosil karu riba término largu. Mester tene konsiderashon tambe ku desentralisashon di produkshon i suministrashon desentralisá di energia lokalmente den barionan i den kolaborashon ku habitantenan.
- **Siguridat di kuminda i dependensia di importashon:** Boneiru ta dependiente di importashon di kuminda pa 95% i ta sumamente vulnerabel pa motibu di e krísis mundial di klima i energia. P'esei e NAS mester kontené presupuestonan konkreto pa fortalese agrikultura lokal, resistente na klima i reforsá kunukunan, pero tambe pa konektá dietanan i patronchinan di kome ku loke por kultivá lokalmente mihó.
- **Salubridat públiko:** Strès di kalor ta un krísis di salú agudo. Mester monitoriá e impakto di kalor ekstremo riba hendenan vulnerabel i hende grandi (malesa i inkremento di mortalidat) i kombati esaki aktivamente a traves di e sistema di kuido di salú. Mester adaptá e manehonan di salubridat públiko, adaptá na e konteksto di e islanan, i protehá e gruponan mas vulnerabel den komunidad. Aunke no a kondusí e Evaluashon di Impakto Sosial, Social Impact Assessment (SIA) na Hulanda Karibense e tempu ei, e resultadonan ta dolorosamente rekonosibel i indudablemente aplikabel pa Boneiru tambe. P'esei ta di gran importansia ku e strategia ta dirigí spesífikamente i pro-aktivamente riba e



gruponan mas eksponé riba e isla. Adishonalmente mester hasi un inventario den e maneho di Boneiru di kon nos por redusí sensashon termiko di bientu i oumentá resiliensia, por ehèmpel dor di planta palu i mata, proveé protekshon di solo i sombra, i establese regulashonnan pa empleadonan ku ta traha den airu liber.

A realisá e punto di bista aki den dialogo, i ku sosten di e siguiente organisashonnan:

- Bonaire Future Farming Foundation
- BonBèrdè
- Caribbean Cetacean Society (CCS)
- ‘Denktank’ di hobennan BitLab
- Fundashon Tienda pa Konsumido Boneriano
- Greenpeace
- Kriabon
- Mangrove Maniacs
- Piskabon
- Stinapa
- Wereld Natuur Fonds

I ekspertonan (riba titulo personal) i demandantenan den e kaso di klima pa Boneiru:

- Alfrida Martis
- Anjelica Cicilia
- Arxen Alders
- Harold “Onnie” Emerenciana
- Helen Angela
- Jackie Bernabela
- Radinka Ustasia
- Reynold “Nolly” Oleana
- Robert Wester

